




BASES DO CONCURSO 2025






CinVigo é un gran festival que busca achegar o mundo científico, nos seus diferentes aspectos, ao gran público, converténdose nun evento anual, no que a ciencia sae ás rúas de Vigo durante a última fin de semana de abril. Buscando xerar un ecosistema no que estudantes, centros educativos e cidadanía en xeral vivan unha experiencia de ocio no ámbito do coñecemento científico.

CinVigo 2025, na súa terceira edición, terá lugar no entorno da cidade de Vigo, en formato presencial, durante o sábado 26 e o domingo 27 de abril; e estará aberto tanto a estudantes participantes na feira científica como público en xeral.

Organizado polo CINBIO (Centro de Investigación en Nanomateriais e Biomedicina da Universidade de Vigo), coa colaboración da *Fundación Española para la Ciencia y la Tecnología - Ministerio de Ciencia, Innovación y Universidades*.

[OBJETIVOS DO CONCURSO]

- Desenvolver ideas innovadoras que fagan que a sociedade se sinta máis atraída pola ciencia.
- Resaltar o carácter global da ciencia.
- Permitir aos participantes o desenvolvemento de materiais de gran calidade científica, de maneira que sexan unha axuda para complementar a súa formación e coñecementos no ámbito científico.
- Animar á docencia a xerar interese pola ciencia de maneira activa para chegar aos estudantes nas aulas.
- Involucrar ao persoal investigador en actividades de divulgación científica.
- Incrementar a cultura científica da cidadanía.
- Amosar a importancia da ciencia para o progreso da sociedade e o benestar da cidadanía.



[MODALIDADES DE PARTICIPACIÓN]

A organización resérvase o dereito a cancelar/pospoñer o evento en caso de que a situación sanitaria así o requira e/ou por outras causas de forza maior. En calquera caso, **CinVigo** será un festival científico 100% presencial.

Os centros educativos e/ou de ensinanza non regrada acudirán a Vigo representados por **grupos de estudantes, acompañados de profesorado**, y expoñerán os seus proxectos no campo da ciencia de maneira gratuíta e aberta a calquera persoa interesada que queira achegarse ao evento.

A participación será en **grupos de mínimo 2 persoas e dun máximo de 4 concursantes**, sempre acompañados por unha persoa pertencente ao equipo docente do centro, que será a responsable do grupo, así como o contacto directo coa organización do evento. Excepcionalmente se permitirá a inscrición de máis participantes no grupo por problemas de participación ou xestión do seu posto expositivo, **pero tendo en conta que hai un máximo 4 premios por categoría**.

[PARTICIPANTES]

O concurso está dirixido a estudantes de ESO, Bacharelato e Ciclos Formativos de calquera centro educativo e/ou de ensinanza non regrada.


Cada equipo estará sempre acompañado/representado por profesorado do centro, unha persoa que será responsable do grupo e servirá de contacto coa organización do concurso.

Se establecen **tres niveis de participación ou categorías**, baseados no curso no que estean as/os estudantes. No caso de grupos con participantes de diferentes cursos, competirán no nivel correspondente ao do estudante no curso superior.

Haberá tres niveis e categorías de participación:

- ✓ **Early researchers:** Estudantes de 1º e 2º de ESO.
- ✓ **Young researchers:** Estudantes de 3º e 4º de ESO.
- ✓ **Teen researchers:** Estudantes de 1º e 2º de Bacharelato e ciclos formativos.

Para participar neste concurso é necesario aceptar a cesión de dereitos de imaxe de todos e todas as participantes, tanto menores como maiores de idade. Por este motivo, para formalizar a participación é necesario aportar documentos de cesión de



dereitos de imaxe firmados ben polos e polas participantes (se son maiores de idade) ou polo pai/nai/titor legal dos menores.

A participación no concurso supón a ocupación e presenza nos stands expositivos do festival, cumprindo os horarios de apertura nos que se desenvolverá a feira, de xeito que o stand de cada grupo estea sempre cuberto por como mínimo dous participantes.

[CRITERIOS DE VALORACIÓN]


Entre todos os proxectos inscritos, un comité científico formado por persoal do CINBIO **seleccionará os proxectos participantes**, que serán os que finalmente concursen no festival científico do 26 e 27 de abril de 2025, contando cada un deles cun stand expositivo propio.

O traballo debe ser de recente elaboración e deberá cumprir as seguintes características:

- Orixinalidade e creatividade.
- Calidade da proposta.
- Mensaxe: adecuación ao concepto ou idea representada.
- Interese e curiosidade despertados co proxecto.
- Utilidade do proxecto na sociedade.
- Presentación correcta e actitude do grupo.
- Accesibilidade, como factor imprescindible para a inclusión social e exemplo de solidariedade no ámbito educativo.

O proxecto deberá ofrecer unha visión atractiva da ciencia, facilitar a súa comprensión por parte de estudantes e público non especializado, valorando as súas posibilidades de alcance e difusión.

Os proxectos presentados deberán demostrar fenómenos da ciencia: principios, conceptos ou teorías. Calquera demostración que explique un fenómeno físico, químico ou natural relacionado coa ciencia.



[PREMIOS]

Os equipos gañadores de cada categoría de CinVigo recibirán os seguintes premios* (por cada unha das persoas integrantes do grupo ata un máximo de 4 persoas):

- **Premio ao mellor grupo *Early researchers*** – Consola de videoxogos ou equivalente*.
- **Premio ao mellor grupo *Young researchers*** – Participación noutra feira científica ou equivalente*.
- **Premio ao mellor grupo *Teen researchers*** – Bolsa de apoio para estudos universitarios*.
- **Premio popular CinVigo** – Estancia en CINBIO ou equivalente*.

** A organización resérvase o dereito de modificar os premios e entregar equivalentes aos arriba mencionados por adaptación a necesidades específicas do grupo de gañadores/as, así como a suspender o premio a algunha categoría se así fose necesario.*


NORMAS PREMIOS:

Premio Young researchers:

- Este premio está suxeito a que os integrantes do grupo (máx. 4) xunto ao seu profesor-a, acudan a unha feira científica nacional a escoller no ano natural seguinte á celebración do festival.
- O premio non superará nunca a cantidade de 500€ por persoa en calidade de desprazamento e aloxamento.
- O premio está suxeito a que o profesor ou profesora se faga responsable dos participantes do grupo. No caso de que algún dos participantes non continúe no mesmo instituto o ano da viaxe, o docente decidirá si se fai responsable do menor na viaxe.

Premio Teen researchers:

- Os/As catro gañadores/as da categoría *Teen researchers* deberán matricularse nunha carreira universitaria no curso académico seguinte ao que reciben o premio (curso 2025/2026).
 - No caso de que o alumnado gañador desta categoría pertenza a 1º de Bacharelato, se gardará o premio un curso académico máis, tendo que estar matriculados na carreira universitaria no curso académico 2026/2027.



- No caso de que o alumnado gañador desta categoría pertenza a ciclos formativos, gardarase o premio o mínimo necesario para que os/as gañadores/as poidan efectuar a matrícula.
- O presente premio non poderá ser percibido máis alá das datas indicadas con anterioridade.
- Este premio é compatible con calquera outra axuda ou bolsa de estudos.
- A contía individual máxima da bolsa será ata un máximo de 750€ para cada estudante gañador do concurso CinVigo 2025, puidendo ser entregado en forma de vale para gastar nun establecemento comercial determinado.
- O pago da bolsa efectuarase no prazo de 4 meses desde a presentación do resgardo de matrícula correspondente.
- Para proceder ao pago, necesitarase presentar o resgardo de matrícula como xustificantes debendo constar o nome completo e DNI do alumno/a así como o certificado de conta bancaria.


Premio popular:

- As catro persoas gañadoras do premio popular acudirán ao CINBIO acompañadas dun/unha docente ao centro durante dúas mañás consecutivas (en horario de 10 a 14h) nas que poderán visitar as instalacións, asistir a pequenos talleres e charlas; e falar de preto con persoal investigador de CINBIO.
- As xornadas estarán sempre coordinadas co centro educativo (e o/a responsable docente), correndo a cargo deste último o desprazamento ata o CINBIO.

[XURADO]

O xurado estará constituído por profesionais da divulgación científica, persoal do CINBIO e personalidades das entidades organizadoras.

Os grupos gañadores faranse públicos ao final do evento. Así mesmo, quedarán publicados na páxina web unha vez finalizado o evento.



O xurado poderá declarar deserto o premio en calquera das modalidades do certame. A participación neste concurso supón a plena aceptación das presentes bases e a conformidade coas decisións do xurado.

[ACEPTACIÓN BASES]

A través da inscrición no concurso se porá a disposición dos/das participantes e os seus titores, os documentos de autorización de participación, cesión de dereitos de imaxe e aceptación de política de protección de datos. A participación no concurso supón a aceptación das bases (e polo tanto a cesión dos citados dereitos).